

四庫全書

集部

欽定四庫全書

集部

大全集卷四
五

詳校官庶吉士_臣李傳熊

中書_臣劉源溥覆勘

總校官原任中允_臣王燕緒

校對官中書_臣李斯咏

謄錄監生_臣譚世偉

欽定四庫全書

大全集卷四

明 高啓 撰

五言古詩

感舊訓宋軍咨見寄

我酒且緩傾聽君放歌行君歌意何苦慷慨陳平生少
為鬪雞兒鮮裘奪春明走馬出飛彈撇捩誇身輕氣服
諸俠徒不倚父與兄落花錦坊南美人理妝迎綠雲晚

不度樓上鳴瑤箏酒酣迸五木脫帽呼輸贏及壯家已
破狂遊恥無成太白犯紫微三辰晦光精金鏡偶淪照
干戈起紛爭中原未失鹿東海方橫鯨遂尋鬼谷師從
之學言兵石室得陰符龍虎隨權衡業成事燕將遠戍
三關營巖谷雨雪霏哀獸常夜鳴撫劍起流涕軍中未
知名奇勲竟難圖迴臨石頭城石頭何壯哉山盤大江
橫黃旗想王氣玉樹沉歌聲晚登臨滄觀惻愴懷古情
覽時識禍機不因憶尊羹飄然別戎府漂水還東征裸

衣佐刺船臨危釋猜萌歸來訪鄉閭亂餘掩蓬荊舊宅人已
改荒池泉尚清瘦妻倚寒機正歎伊威盈相迎不相笑伏雉
為重烹從茲謝行役閒園事躬耕昔同徒步人十年擁麾旌
鴻毛獨未順蹭蹬違霄程知音竟為誰四海嗟惛惛齊竽不
解奏楚璞何由呈懶求薦辟書傲然揖公卿衰蕙弔蟋蟀柔
桑喚鷓鴣閉門節屢變壯魄空潛驚顧予雖腐儒當年亦崢
嶸小將說諸侯捧槃定從盟大欲千萬乘獻策登蓬瀛洪濶
阻川途浮雲蔽天京終焉困澤畔日暮吟離衡賤貧此時居

復與喪亂并何殊九月中嚴霜折枯莖頗聞君子心道窮貴
益貞已志未獲施安用軒裳榮所以不苟出出則時當平今
晨喜逢君有壺對前楹風日初澹沲櫻桃作繁英適意不一
醉屑屑徒悲縈達人若相遇大笑絕冠纓

蕭鍊師鷹窠絕頂丹房

人間不可住混濁同腐腥一落三十年塵夢無由醒稍
聞方士說恍惚通仙靈羨門與偓佺相期餌芝苓自顧
真病鶴秋風墮疎翎碧海不得渡煙霧愁冥冥師從天

姥來身佩豁落經不邀五利寵深棲鍊神形東觀鷹巢
峯中天插孤青其下吐浴日其高星飛星昔有學道侶
井臼遺巖扃愛茲絕俗地遂爾留軒輶太鼎生紫煙丹
成衛天丁金骨坐可蛻騎龍駕風霆積水浮方壺東望
類點萍紫臺白玉榜中有真人庭飛遊願從師往讀新
宮銘

隨月圖

空齋無短檠愁度新涼夜青天素娥出餘輝獨堪借達

曙願徘徊莫逐秋河下

映雪圖

簷雪不能掃留映寒窓白書字細如蠅坐看還歷歷華
燈照歌帳誰似南鄰客

顧榮廟

晉侍中顧彥先有墓并祠在長洲之東久而廢
為淫祀縣令周君復之為賦是詩

軍司吳國秀機神夙超朗弱冠遊洛師已蒙南金賞崎

嶇諸王幕沉湎務遵養中罹廣陵艱計服匪誠枉風雲
一揮扇義旅臻同響事成恥言勲飄然理歸鞅晉社始
東遷羣賢悉收獎道謁真感會矯翼丹霄上德聞一代
稱跡泯千齡往時屯乏良佐英謨益堪想墳祠托荒郊
蕭條並榛莽童侵雨隧淫巫闖塵幌大夫過停轅式
瞻為含愴衣冠復故貌筵几陳新享寡劣忝鄉人因歌
表遐仰

停君白玉卮

停君白玉卮聽我前致辭家本吳門市英風慕要離少
年貧無行鄉里不相推喜過毛公舍懶下董子帷偶從
岸頭侯跨鞍赴邊陲欲邀深入勲終然計無奇歸來冠
側注始學窺詩書稍通鄒魯生盡謝燕趙兒焉知事益
謬空言竟難施布衣走路旁但為衆所嗤廷中忌賈誼
門下誣張儀二子豈不辯未能免讒疑嗚呼今之人孰
解容不羈我將棄浮名垂釣東海湄長笑調魯連高歌
酌安期素心儻有合豈要餘子知

讀史

周衰禮樂廢大道成榛菅羸秦任商君王制欲盡刪厚
賦山澤空亟戰原野殷頽波自茲靡千秋去無還誰云
重華駕邈矣難仰攀於焉誦其書如造揖讓班安得鳳
凰鳥飛下浮雲間

雜詩

朝臨高臺上俯視崇岡下春暉何悠悠清川自東瀉陽
和發卉物時澤均播灑如何及芳辰蕭條但空野願言

釋拘局登高騁吾馬曠途不見人憂心何由寫興謝固
其常吾將尤誰者

池上鴈

野性不受畜逍遙戀江渚冥飛惜未高偶為弋者取幸
來君園中華沼得遊處雖蒙惠養意飽飼貸庖者終焉
懷慙驚不復少容與耿耿宵光遲撼撼寒響聚風露秋
叢陰孤宿斂殘羽豈無鳬與鶩相顧非舊侶朔漠饒燕
雲夢澤多楚雨遐鄉萬里外哀鳴每延佇猶懷主恩深

未忍輕遠舉，儻令寄邊音。申報聊自許。

題綠綺軒

幽抱時欲寫，帷中有鳴弦。一彈落一葉，庭樹坐蕭然。寂寂山水夜，迢迢河漢天。憶聽烏啼起，南軒人未眠。

答張山人憲

聽君辛苦詞，感我艱難情。百年自有為，安用文章名。雞鳴海光動，車馬塵滿城。相逢無新舊，言合意自傾。奉觴置君前，長歌發哀聲。時乎苟未得，飲此全其生。

澄景閣夜宴

王孫喜留宴開閣望明河是夕月微暈涼風池上多棲
禽翻暗叢駭魚動圓波清景厭絲竹雅咏答高歌尊酌
願勿間良宵易蹉跎預憂別在旦車馬層城阿

贈馬冠軍

一騎東方來相逢新豐市自言讀父書出身良家子名
在欣飛藉蘭纓懸鹿盧曾為魏其客不作平陽奴欲行
渡狼河直擒射鵬將壯志忽蹉跎秋風卧孤帳解裝出

我筑歌作變徵聲
壚頭落日在歌罷
酒再行相君本鳶
肩豈是沉淪者
我亦方薄遊
低頭向人下
有志事竟成
古人不欺余
留將一白羽
待射魯連書

送劉明府

賤士寡諧世
放居江海邊
朋儔漸乖睽
憔悴不自妍
顧影鮮歡趣
惡離倍當年
他人亦以悲
况復如子賢
荒途風霜交
歲晏增慨然
亂雀噪叢棘
驚鴻逝長天
斗酒豈足陳
薄意聊以宣
出處道既殊
不得長周旋
誰謂非遐

方浮雲阻山川何以慰渴飢令名期可傳

暮歸

朝出難始啼暮歸鳥欲棲我身本無役胡為亦東西徒
步二十年風埃面空驚入門聞鄰杵秋氣凜以淒芙蓉
墜古沼絡緯鳴中閨有無了不問歌吟夜燈低富貴固
有日我志焉能迷笑向細君道勿為翁子妻

澹室為吳君賦

素士脫紈綺澹然怡道心窮廬車馬絕寒鳥下庭陰酒

外寡真趣琴中多古音閉門三日卧風雪滿城深

空明道人詩

我聞赤城東仙嶠名委羽煙霞閉深洞絕壁飛玉鼠空
明中有天日月照瓊宇昔人鍊丹成自駕黃鶴舉陳翁
夙慕道棲此求真侶玄文夜長披靈藥朝每茹石室人
不來閒眠青蘿雨於今定非死飛遊去何許海上幾秋
風誰傳令威語

九日無酒步至西汀閒眺

高天無游氛秋氣自激肅離居時節變霜降未授服蕭
條野田間晨步聊遠矚悠悠寒川駛靡靡晴巒矗菊叢
有清香木葉無故綠親朋去我遠登高且連躅孤懷誰
知音惆悵臨水曲名酒不可尋歸來掩茅屋

題倪雲林所畫義興山水圖

嘗暇陽羨茗不遊陽羨山銅官結秀色都在畫圖間樊
川醉遊處水榭依沙樹雲入縣城來谿流太湖去我愛
雲林生高歌無俗情石庭梅欲發須放酒船行

錢孝子廬墓

錢吳越忠孝王之後也

颯颯黃竹嶺蕭蕭白楊村行人亦悲哀何況父母恩不
忍返華屋結廬傍孤墳啼猿應哭聲日暮空山昏無鄰
與誰語獨宿傷精神仰聞松柏吟俛見狐兔奔淚灑墓
前草當春死芳根至性有如斯不媿忠孝門

送蜀山人歸吳興兼簡菁山靜者

南浦無碧草征鴻晨稍飛何當杪秋節臨水送將歸既
來不能淹君心應好違惻惻袂始判遙遙帆已微天高

桂樹落人在山中稀還尋同袍者更製薜蘿衣

幼文約余與止仲同宿士明鶴瓢山房為試茶
之會余既入郭而幼文已歸山中士明亦往海
上止仲復以事不赴士明姪元脩留余夜話因
賦是詩以書耿耿

道人出未歸高士來復去試茗失幽期寒齋成獨住冰
生洗藥池風動懸瓢樹賴有阿咸賢玄談到天曙

晚憩靈鷲院池上

微雨過祇樹寺齋涼已多臨池一就盥搖動滿池荷風
後扇力輕煙中爐氣和慙非許玄度吟卧每來過

贈談鬼谷數瞽師金松隱

我聞鬼谷子乃是古仙真避世青谿中不汙戰國塵著
書十三章當年授儀秦二子不善用竟皆殺其身瞽師
得異傳相去逾千春不為從衡說談數妙入神往年客
南都蓬門集朱輪下簾論玄理驚動金陵人歸來隱虞
山繞廬樹松筠誰言目無覩內照靈光新緬思大化根

生此下土民起滅千萬途孰能究其因或愚騁結駟或
賢被懸鶉命也可奈何天道誰疎親世事慎守常毋使
徒紛綸

贈惠山醫僧東山

九峯聚錫麓一水回梁谿之子脩淨業長年此幽棲曲
彈白雪妙詩吟碧雲低况有醫龍方丹成重刀圭採藥
夜歸院蘿月照澗西扁舟欲相訪愁作武陵迷

媯蜚太史自海上入郭因得追遊以叙舊好今

日風雨偶闕晤言樓居早寒懷人尤甚想孤寓
僧林同此岑寂也賦是以寄瞻戀之意

良人曠清晤窮年秉離憂倏來自海壖諧我心所求不
殊雲中雁和鳴得其儔宴閣既連席行塘復同舟坐聆金玉篇
鄙拙何以酬風雨戒茲旦居然阻從游祇園念孤寓微瘵苦未
瘳落葉曉早寒誰當慰淹留朋來不我館顧已良有由徒茲睇
傳雲夕倚城南樓在遠分難親居近彌使愁信彼詩中言一日如三秋
送徐七山人往蜀山書舍

結客抱狂志傾身通俠交東將觀渤海西欲踰函嶠奔
蹄脫驚轡墮翩連飛鑣酒具載車出兵法篝燈鈔從軍
願奮立學儒恥譏嘲寧期憂事集頓使芳年拋塵衣曉
城陌雪帽寒江郊客堂感蟋蟀婦室悲蠨蛸自笑失水
鮒空慚得雲蛟獲君乃瑚璉顧我猶斗筭高懷矯衰薄
雅音變哇咬談詩辨六義讀易窮諸爻情親豈殊意氣
合真同胞因依像輪輻暢和諧塤匏妓席夜留宴僧扉
晝攜敲循花縱步屨映柳持鳴鞘塘行月艷艷林卧風

稍稍要渺送謳唱瀾翻雜詠咽匕滑炊野飯盤香薦山
肴遭時雖齟齬處俗不混淆曩遊既相挈茲離竟誰教
浮湖理去榜祖道移中庖遐方未罷戍近日猶被抄鹿
驚互奔併虎鬪仍咆哮荒墟少砧杵遠壘多笳鼓問徃
何土里答云此巖壑人安地有阻歲稔田無燒牛羊可
放牧薦鴨供燂炮湍長磯磴激石古窪樽坳樵斤聽伐
木獵火看除茆雨紅爛秋實露紫舒夏苞谿晴鴈拍拍
村曙雞膠膠書聲隱篁竹棹響穿蒲茭聊將偶沮溺誰

敢儕夷巢末事誠瑣瑣大言匪嘐嘐世險路生穽名浮
浪吹泡漚擬共把干戚行俱包社舖飲烹狗臘祀歌
迎猫慎勿厭寂寞長當謝紛曉

會宿城西客樓送王太史

君來歡不足君去憂何遽共聽楓橋鐘留連恐將曙蛩
鳴故苑草鳥起高城樹明日獨登樓歸帆渺何處

題林居圖兼簡盧公武

竹梧翳苔石知是幽人居林間鳥鳴後亭空賓散餘聞

有盧鴻隱長年留著書

鴻山書舍圖為黃君伯淵賦

伯鸞鸞春地井臼有遺跡之子學幽棲托踪在林石清
風竹林曉片月蘿逕夕遙想一齋空圖書滿牀積

詠三良

殉葬古所禁秦國固戎風穆公臨棄朝要此三臣從三
臣百夫良不與親暱同一旦使俱斃無人國將空捐生
豈不難忠義感素衷長恐先朝露無由奉君終遺命凜

在耳焉能惜微躬但懼嗣主孤誰當共成功高墳荆棘
間玄雲閉幽宮壯魄同此歸冥冥路安通國人痛莫贖
灑淚呼彼穹傷哉黃鳥詩流哀竟無窮

詠荆軻

劫盟非義舉曹沫已可羞燕丹一何愚區區祖遺謀千
金養荆卿誓將報強讎奉圖使入關心知絕回輶賓客
盡白衣相送易水頭酒酣涕難落筑聲和悲謳猛氣激
蒼旻長虹為西流行行造秦庭陞戟衛甚周臨機失始

圖利鋒竟虛投豪主一按劒社稷脩已丘先王禮樂生
破齊震諸侯苟能得此賢伯業猶可修胡為任輕易自
趣亡滅憂徒令後世人歎惋餘千秋

魏使君見示呂忠肅公舊贈詩因賦

公昔隱江夏巖棲避兵革遠挹戴叔鸞清風灑泉石有
時歌梁甫慷慨人未識左丞中朝彥仗節任方伯北還
駐嚴程造廬問籌策知非山澤儒期是廊廟客磯石繫
官舫猿叫月初夕秉燭題贈詩蒲圻掩孤驛欣欣得賢

喜耿耿憂國戚短章寄深情相投重珪璧邇來復幾年
淪落已陳迹公起佐興運身名正輝赫侍誦肅春闈專
城森畫戟緬懷舊知己永歎泉壤隔難縣延陵劍空聽
山陽笛遺篇篋中藏每誦如再覩真能重友道未易薄
俗易一言不忍忘況乃膺寵錫小大固可知令人義肝
激

題秋林高士圖

二仲有玄賞相攜在中林遐景延迴步微言諧素襟天

秋谷響哀日暝川光陰風駛多委葉山空少歸禽威遲
臨長岡迢遞指遠岑諒非羈離客詎用愁登臨

春草軒雨中懷王太史

西軒罷琴坐涼思欺白苧颯颯樹聲繁秋風滿池雨蓮
衰少暗馥禽靜多幽語對此闕良儔當歡反傷緒

始遷西齋

乍懸南樓榻始布西齋筵西齋非吾廬幽靜亦可憐風
牖竹裊裊露庭菊鮮鮮圖史左右陳永日坐一氍毹嬾

數童子哦誦當我前為爾竟寂寂低回欲窮年讀書將
何為乃與始志愆進無適時材退乏負郭田我生非匏
瓜謀食有道焉苟得隨羣趨顧此不稍賢飲餘解衣卧
毋朝腹便便

次徐山人與倪雲林贈答詩韻

昔遊紫藤塢空山鶴鳴秋相望隱人居興闌竟回舟邇
來獲晤賞玄談劇風流每欲開南軒招我共偃休天寒
鴻鴈鳴菱荷落長洲豈無一釣船訪子谿水頭終慚文

墨牽咫尺成阻脩聽雨掩閣卧觀泉上巖遊朝覽贈答
篇詞藻誇兩優我本丘壑人猿鶴肯見留擬結歲晏期
壺觴展綢繆况聆西澗濱禪宮閤清幽夜看太湖月遲
我同登樓

因病不飲

我昔無所求但愁酒杯空引滿先四座醉豪壓春風年
來病稍侵積憂復相攻舉觴不能吞若有物梗胃歲晏
風雨多擁爐坐窗中酒徒散去盡歡呼與誰同三杯即

頽然憔悴映燈紅後老當奈何即今已如翁斯味禹所
惡攝生笑無功從此便可止賦詩繼陶公

三鳥

三鳥生異林相逢偶同飛各矜好毛羽吟弄朝陽輝驚
風動地至羣飛各乖違一翔入雲天一落陷虞機一止
野田間蓬蒿鬱相依啄啄有餘粟歲晏諒不飢猶懼雪
霜侵啁啾獨鳴悲我行見此鳥相對發歎歎當知皇天
仁偏恤爾陋微視陷宜省畏瞻高勿貪希田間適本性

舍此欲何歸

題陳生畫

前邨夕陽明後嶺秋嵐積葉落露山亭潮來沒江石遙
遙射鴈子慘慘聽猿客何事下征帆西陵渡頭驛

青丘道中

霖雨江暴溢奔流絕津涯茫茫野田白何由見春華居
人久已亡流萍滿其家昔我過此土極目桑與麻故道
不可尋舟行但蒹葭歲凶豈宜客四顧空長嗟

送李用和提舉

髯君孤直士與世頗異儔不交金張家而獨與我遊我
居在君里衡門閉深幽十年誦詩書進取拙自謀名藩
多英豪光彩溢道周朝逢將軍車暮避刺史驕皆云意
氣盛官高富春秋良辰競為樂廣席羅珍羞君獨日暮
歸貧乃與我侔雪畦寒蔬茁冰盎春蛆浮高堂可燃燭
談詠相賡酬中間阻清歡離別良有由我尋江干宅君
赴海上州老馬從瘦童人皆識賢侯今年見歸旌一笑

忘積憂那知遠方賈復此待撫柔雞鳴城東門不得送
去舟颶風常晝驚洪濤極天流雖能征重貨可失咨嘉
猷君子且在傍願言毋久留

贈銅臺李壯士

我祖昔都鄴神武為世雄至今銅臺下子弟習其風問
君家何方紫陌遙相通雖云此相遇情與鄉里同君有
力振虎勇氣聞山東匹馬輕俠遊刀環綴纓紅正當兵
塵起思立尺寸功不從董健兒欲縛蕭老公凌厲越宋

土逶迤出齊中時人不相顧棄之若秋蓬我豈白面郎
少年亦困窮起為壯士歌迅商薄高穹初飲五斗盡再
飲一石空與君豈樂禍西方見妖虹莫謂著鞭晚艱難
殊未終

題春江送別圖送王使君

歌徹小秦王愁深第幾觴飛花蕩春影江水不勝長日
暮東風急離帆且緩張

蘭室為袁首郎賦

湘臯春水深
澧浦秋風早
如何庭戶間
芳蕤獨妍好
不有君子心
憔悴同芳草

我愁

我愁何從來
秋至忽見之
欲言竟難名
泯然聊自知
汲汲豈畏老
棲棲詎嗟卑
既非貧士歎
寧是遷客悲
謂在念歸日
故鄉未曾離
謂當送別處
親愛元無睽
初將比蔓草
夕露不可萎
又將比煙霧
秋風未能披
藹然心目間
來速去苦遲
借問有此愁
于今幾何時
昔宅西澗濱

尚樂山水奇茲還東園中重歎草木衰閒居誰我顧惟有愁相隨世人多自歡遊晏方未疲而我獨懷此徘徊自何為

賦得法華雨送惠上人歸江上

慈雲起靈山虛空寶花雨遙從天女手零亂飄春曙香滋淨沼蓮影拂祇園樹高僧結習銷衣上留不住唯隨一葦風飛渡江南去

秋風

秋風屋外来落葉紛我傍不出門幾日我樹如此黃但
覺成癩性焉知逝顏光朝餐止一盂夕卧惟一床仲尼
欲行道轍迹環四方而我何為者不與世相忘

秋雨

秋雨亂我竹堂上中夜驚昏昏起復卧策策止且鳴未
分醉夢狀寧辨竹雨聲初欣似張樂終懼如聞兵既覺
兩皆非古槩耿自明悟彼事亦然胡為勞我生

題曹氏春江雲舍

遙波靄微雲寒禽少相語君家在空閣欲往迷洲渚紛
紛樹離霧稍稍花消雨日暮坐相思江東渺何許

燕客次蔡參軍韻

林旦未昇旭巖深稍祛霏夙興達仙曙在公遑告腓良
儔信可懷彌月曠容微偶茲解華轡沽酒酬芳卮鈴騶
儼衛齋妓樂出房帷放吏命決漏留賓教闔扉談笑竹
下塵賭墅花間慕歡罄展宿好言長蠲積思佳辰子所
惜高誼子攸希時難賸睽阻能此嗟為誰願各保太和

長年樂施施飛佩儻可接東方候安期

退思齋為蔡叅軍賦

雞鳴起趨府事至紛善惑應茲苟弗推在理寧免忒歸
來坐深念恒恐有慚德缺政何以裨厚責何以塞豈徒
省厥躬庶用匡爾國昔聞獨樂叟中夜忘寢息願君守
勿渝明明此遺則

遊師子林次倪雲林韻

吟策頻入院道人知我閒尋幽到深處鳥語竹班班林

下不逢客城中俄見山牀敷有餘地鐘動莫催還

尹明府所藏徐熙嘉蔬圖

少賤習園事種蔬每盈疇深根閱玄冬老葉凌素秋採
擷風露餘山庖足嘉羞故園經亂後蔓草日已稠野水
流畦間蟲聲暮啁啾披圖似見之惻愴起我愁食肉豈
無人斯世誰與謀君多恤民意毋忽歲饑憂

來鴻軒

高鴻本冥飛不墮虞羅裏朝度雲中關夕遊瀟湘水驚

風吹行斷儔侶忽萬里哀鳴將何依荒澤難獨止集君
華池側梁稻豐自美響度風脩脩影沉波瀾瀾充庖知
不忍善惠念終始願君儀天朝修翰共騫起

蘿徑

幽谿入蘿蔦幾曲到巖扉夏鳥深啼處陰陰花墜稀知
當煙暝後從此荷樵歸

茶軒

摘芳試新泉手滌林下器一榻鬢絲傍輕煙散遙吹不

用醒吟魂幽人自無睡

讀書

世物寡所嗜雅情竹素間憑案理殘帙樂此終日閒爰
觀自周衰盛治不可還淫辨相擠傾大道成榛管巧詐
足眩世苟得不顧患嬴秦任商君王制欲盡刪厚賦山
澤空亟戰原野殘流風自斯降誅求困孤孱是非千萬
途欲辨亦已艱賴茲聖冊存足啟昏與頑誰云古哲駕
邈矣難仰攀於焉誦其言如造揖讓班寄語向俗子幸

勿叩我關何暇從爾談方對孔與顏

過立公房

空院閒深竹幽花有孤妍春深鳥語寂風磬時冷然非
茲絕塵地何以寄高禪

賦得桃塢送別

何地芳菲滿吳趨曲陌西藏金非漢壘種樹似秦谿未
曙忽霞起過春猶雪迷葉聞渡江唱花憶映門題折時
或傍水遊處每成蹊偶來因送客腸斷有鶯啼

東園種蔬

我非適世材學圃乃所宜種蔬居東園鋤灌敢告疲夏
來風露繁衆綠俱紛披朝餐摘我菰暮餐芼我葵此味
賤所嗜蔓草勿害之慨彼主父言鼎食何其危

聞張著作值雨宿陳山人園因寄

芳月抱深惻佳遊闕追攀聞君獨命駕遠造幽人關春
園花絮稀啼鳥池上閒留連宿煙閣尊酌解離顏遙想
清夜徂鳴弦竹林間非因雨成滯興慙自忘還

鄭隱君秀野軒圖

江晚洲渚交雨晴草菲菲前山靄欲闌
畧師渡水歸望煙知君家花竹隱半扉
已休田中耒猶響林下機此鄉即桃源
亂後世應稀開圖若身到不知塵境非

與諸公飲綠茗園

金塘環勝墅綈綺會芳時雀乳依桐葉
魚翻罨芰絲詩流洛下詠歌艷郢中詞
一念交歡厚觴至詎能辭

送上海石明府

三月熟桑椹四月落棗花布穀樹下飛塘轉邨路斜東
塍擊耕鼓西林擲綠車但言此地樂不聞此地嗟雖無
夕烽驚尚苦秋賦加煩君始到日為我問田家

逢雲巖僧元實將赴湖上賦以送之

早懷塵外想每訪林間蹤空齋哦夜雪共聽雲巖鐘西
澗已久別東城忽相逢還當布袈裟去坐湖上峯喧寂
既殊調無因復追從倚閣一遙送秋山紅樹重

舟歸雨中

猿鳴楚雨急江岸孤舟次前山到非遠已見煙中寺寒
景暮蒼然歸人獨愁思

秋夜會飲送劉別駕得星字

征馬已歸卓哀鴻方過庭何期當別夜還得聚寒廳客
醉誦明月僕興瞻落星光銷帷中燭響動車前鈴留連
豈有極之子不遑寧

送陳博士歸番禺葬親

北風海欲冰凜此窮陰時問君歸何亟親葬不可遲遙

遙望郭門慘慘投山陂僧房拜遺軀瓦燈照塵帷還當
卜玄宮遠托瘴水湄日夕既封樹慟哭行繞之雨來青
楓林猿鳥吟相悲化者苟得安萬事無足為奈何割裾
子尚忍生違離

渡吳松江

稍離城郭喧遠適滄洲趣乘潮動旅榜霧散寒江曙蒼
蕪靡靡出白鳥翻翻去不識野人邨舟中望高樹遭時
歎有棘拯物慚無具不向此鄉居飄零復何處

無言上人丈室逢李道士

竹間失舊蹊落葉紛已積閒來繙經院戶掩諸蟲寂本
尋釋門子偶值仙家客景清林意秋慮淡池光夕相對
總忘言誰云累名跡

贈陶蓬先生

魯連豈趙客子房非漢臣出處誠莫測自是神仙人中
解龍虎鬪飄然去難親夫子古鬚眉恍惚乃後身長安
昔縱酒叩閣通平津豈為慕珪組但欲陳經綸白璧棄

路旁舉世不見珍歸來棹扁舟煙波復誰馴豈無一杯
水為君灑風塵空將釣國手老坐東海濱逢余向滄洲
笑落頭上巾謂余有僊契泥滓非久淪花源罷通世煙
霞閉千春便從夫子歸雞黍會四鄰持謝漁舟子休談
晉與秦

孤鶴篇

涼風吹廣澤日暮多浮埃中有失侶鶴孤鳴迴且哀修
翮既摧殘一飛四徘徊矯首望靈嶠雲路何遼哉渚田

有遺粟欲下羣鴻猜豈不懷苦飢懼彼羅網災翩翩浮
丘伯朝從東海來相呼與之歸謂是仙驥材蔭之長林
下濯之清澗隈圓吭發高唳華月中宵開誓從臨玄景
永戲崑丘臺

雜詩

結髮好遠遊出門覽山川誰云帝闕遠有路不在天我
車大且遲日暮牛領穿忽逢悲歌士論心涕潸然今日
不得志明日非少年

白水冒我田

白水冒我田風雨無休時
午鳩屋上鳴貧家起何遲
溝壑知不免順受胡可辭
有酒我自斟有粟妻自炊
且盡今日歡勿顧明日悲
商歌出金石愧無聖人師

送韓司馬赴邊郡

淮陰將家子讀書負奇氣
十年役一筆身從李都尉
此行把旌麾無愧國士知
邊風吹白草正是馬驕時
鳴笳引前部落日城西
路上客贈吳鉤征人唱都護
近役非

臨洮君行莫辭勞欲問封侯日秋來太白高

醉贈王卿

持身無可許閭里任浮沉不奉諸侯檄曾辭公子金斗
酒豈辭醉感君知我深誰無旦暮急相周惟季心

送賈二文學北游

窮年自多感况復送良儔落日河上別慷慨發秦謳風
塵阻關山撫劍不得遊願逐高飛翼相與出九州嗟彼
行路子栖栖何所求

送海昌守李使君遷海虞

兩為海上州州民定何如彼遮使君馬此迎使君車但
令人買牛不受客饋魚我知使君賢讀律又讀書

端居懷兩王孝廉

寡劣時所棄獨卧無與親蕭然閉齋閣左右圖史陳風
雨摧衆芳令人怨徂春豈無尊中酒坐念兩故人日從
賢豪遊雜還車馬塵焉知離居客積抱難自伸

送芑上人東歸

浮雲與飛鳥相聚安可常偶來雲巖寺幾日共徜徉我
去師亦歸澗房欲荒涼池卧孤塔影庭棲雙桂香重過
應未期悵然山水長

大水

吾鄉水為國自昔稱漏天今年尤苦霖冒此上下田老
農愁相告無有二十年東江入門流比屋如敗船夜卧
牀屢移晨炊釜常懸涼風吹蒲稗羣鵝鳴我前茫茫失
川途出行竟回遘斯民欲昏墊天意豈不憐陰陽致乖

冷孰能究其然歲飢尚勿憂黽勉當食鮮

送黃主簿之歸安

我歌柳惲詩送子南汀發山城逢社雨綠樹啼鶯歇留
連孤艇遲悵悵雙壺竭高士尚為簿休慚府中謁無事
坐閒廳彈琴看明月

送王推官赴譙陽

久治亂所伏國家失其防初如決洪流拱手徧四方頻
年勞許謨欲補千百瘡子為京師客忠憤何慨慷濯冠

捧書函平明獻朝堂上言固大業下言振頽綱且謂有
萬死聖明察臣狂臣言儻獲施立能致時康宸居豈遙
遠咫尺天中央雞鳴列仙仗九門洞開張謂宜即召見
拜起隨班行上殿笏畫地論奏盡敷詳如何竟報聞不
得瞻清光一官非所願欲令赴蠻荒徘徊出都門風雨
濕曉裝行行過吳洲木葉秋始黃逢予解鞍飲激烈推
酒牀平生憂時心辛苦不自忘頗聞到官所此去路尚
長紅日出霧遲孤城海茫茫遺民似猿鹿山谷多驚藏

繁英艷躑躅瑣實推檳榔瘴癘況時作投老恐子傷何
不且少留共驚豪華鄉子笑不我顧翩然決南翔明朝
指鯨波高帆若雲揚去矣各異國有憶徒相望

大全集卷四

欽定四庫全書

大全集卷五

明 高啓 撰

五言古詩

吳王郊臺

周網昔隳頓禮樂由諸侯吳子之代德居然祀園丘
燔升紫壇青絃暎玄裘靈明豈來歆幣玉空旅羞國南
見遺遺蕭條委山陬雲和罷九奏草樹鳴颼颼從來跋

扈徒幾人效其尤魯郊失禮始聖筆書春秋

長洲苑

中國久無伯闔閭思騁功講蒐開別苑訓武出離宮宰
詔應驂乘巫臣實御戎鼓鳴深谷應置掩廣場空遠曳
捎雲旆高彎射月弓三驅儀已畢七伐步還同甲騎從
輿後蛾眉侍幄中煮胎須紫豹脰掌得玄熊樂事方難
極英圖忽易窮城迷歌黍客地屬采菱童輦道崩秋雨
旗門失晚風犬亡魏肆狡人去雉爭雄草樹迎蕭索湖

山罷鬱葱猶疑見獵火寒燒夜深紅

角里邨

高皇本壯士提劍定四方晚為兒女情悲歌起彷徨愛
子欲建儲寵姬方侍側顧驚四老人謂已成羽翼大臣
豈不諫孰能幹天機彼翁何為者足見人心歸始潛避
秦君終出安漢嗣世羅焉能羈舒卷聊自肆我來角里
邨如入商顏山紫芝日已老黃鵠何時還斯人神仙徒
千載形不滅猶想蒼巖中白頭卧松雪

死亭灣

貧賤衆所棄豈惟愚婦人
珪組何重輕能令變交親
翁子昔未達妻去恥負薪
五十非晚貴不能待終晨
一旦謁帝閣還家繡衣新
邸吏驚赤綬邦人候朱輪
無顏見故夫自殺此水濱
誰知孟德耀元在爾東鄰

毛公壇

欲觀漢壇符東上縹緲峰
葛花墜寒露夕飲清心曾月
出太湖水鶴鳴空澗松真境
久寂寥蒼苔闕靈蹤嘗聞

綠毛叟變化猶神龍世人豈得見偶許樵夫逢攀險力
易疲探玄志難從歸出白雲外空聞仙觀鐘

稚兒塔

黃土但埋骨豈能理性靈昔聞宿草間曾吐蓮花青身
卧長夜臺口誦西方經尋跡殊宵宵聞聲每泠泠寒燈
照空塔時有山僧聽應使鄰冢魂沉迷盡皆醒

三賢堂

吾邦古名藩出守皆時賢有唐三使君風流最能傳韋

公既前蹈劉白乃後連政成屬時康民瘵各已痊良辰
極游會消搖若神仙畫戟衛高館彩舟漾平川晨移閒
齋檜夕賞華池蓮逸韻邁羣流豈將文墨牽至今郡中
人猶想布治年時事屢變易遺祠委榛烟湖山少清氣
草木空餘妍嗟我生苦遲無由廁賓筵殷勤展夙慕載
詠西樓篇

干將墓

干將善鑄劍劍成終殺身吳伯亦遂亡神物豈不神始

知服諸侯威武不及仁徒勞冶金鐵精光動星辰莫邪
應同埋荒草千古春青蛇塚間出猶欲恐耕人

吳桓王墓

朝出南郭門高墳鬱蒼蒼借問葬者誰乃是長沙王黃
腸豈不錮盜發取所藏金環出世間封樹無暉光緬想
哀炎際當塗逞奸強英雄失所據虎視誰敢當王初奮
穉孤英風凜飛霜談笑定江東賢豪歎來翔少假須臾
年足見伯道昌胡為困仇奴輕獵不自防天意豈佑魏

遽使斯人亡因觀感往事喟焉令人傷

虎丘次清遠道士詩韻

神仙不可羈乘螭躡雲漢豈將避羸劉荒山事窮竄何
年東觀海一至此峰翫悠悠清詩傳宵宵遺跡漫我來
繼登臨長嘯憤初岸既秋烟蘿疎欲雨風竹亂夜深空
潭黑月吐石壁半龍驚汲僧來鳥喜遊客散閣掩林下
夕鐘鳴巖中旦勝賞誰能窮今古付篇翰飛騰子何之
汨沒余可歎安得挈真期超然豁靈贊

天平山

入山旭光迎出山月明送十里松杉風吹醒塵土夢茲
山凡幾到題字遍巖洞陽崖樹冬榮陰谷泉夏凍怪石
立誰扶靈草生豈種白雲翦然來諸峰欲浮動高鶻有
危棲幽禽無俗哢凌蘚知履滑披嵐覺裘重嘗登最上
顛遠見湖影空漁樵度谿孤鳥雀歸却衆還尋老僧居
隔竹聽清誦慰我躋攀勞為設茶筍供幾年歷憂歡造
物若擲弄迷途遠山林遲暮堪自訟難追謝公遊空發

阮生慟身今解組紱明時愧無用閒持九節筇尋訪事
狂縱石屋秋可眠山猿許分共

讀書所為錫山朱隱君子敬賦

高士寡所嗜雅情竹素間北窗夏陰敷散帙欣燕閒汎
觀古始來治忽儼未刪重華去已遠鳴鳳何時還微言
雖能尋往躅那可攀當感既拊懷遇得亦解顏詠歌南
風前至樂孰與班方爾對聖賢俗子毋扣關

丁山人清越軒

夏雨濯高綠氤氲冒茲軒微涼灑林表沉色泛谿源羨
子耽獨賞慙予嬰衆喧披襟一蕭散憶在郭西園

西齋池上芙蓉

池荷已衰颯孤艷仍獨在滄洲遠夢違風露妍姿改窈
窕徒自媚寂寞還誰待此地托根偏非無美人採

贈張主簿

離離平臯禾纂纂橫林棗客行愛樂土秋晚華亭道停
燭春紛遲鳴榔潭漁早借問何能然年來縣官好

客有不樂者

客有不樂者默坐空堂幽明燈照孤影對酒不能酬風
雨忽夜至單衣颯驚秋葉隕已撼撼蟲鳴尚悠悠於當
屬有念苦願羣聲收讀書仰千古命駕志九州孰云吾
多智有已不解謀冥飛既難攀苟得亦可羞守道固寂
寞寂寞諒誰尤

送張文學之攜李

四川帶綠樹窈窕有鳴禽江郭去非遠傷離空滿襟林

中古殿靜池上高齋陰應想彈琴士杏花春雨深

贈羣上人

湖雨洗秋碧西南見諸峰中有楞伽僧迴闕超世蹤高
風搖飛泉落日帶遠松欲往已知處烟蘿鳴飯鐘

送李別駕赴越

常別豈不感此別尤可嗟一別一去遠魂斷秋無涯我
何恨別君君猶別其家霜露滿故園不待菊有花越禽
啼楓林路盡秋日斜到郡且足樂聞有山水嘉

龍門

龍門何崢嶸此地表奇蹟山分兩崖青天豁一罅白知
非禹功鑿想是鬼手劈長為風雨關開闔自朝夕深含
未吐雲對峙不崩石日光寒易傾苔色陰更積只疑過
此內便與人境隔始窺已幽深漸入尤險窄暗中把危
藤蜿蜒欲驚魄僧留看古刻敲火照絕壁晚聞松竹號
洶若波浪激不知神魚飛到此誰點額我嘗謁真龍天
門謬通籍何必更區區求為李膺客

太湖

長谿如白虹分走荆雲派具區納羣流襟帶三郡界太
虛混鴻濛元氣流沆瀣初疑溟渤寬稍覺雲夢隘茫茫
鴈飛遲颯颯帆度快雨來鼉報鳴風起鷗驚邁神龍作
淵都豈復數鱗介珠光照水府不受白日曠朝看礪車雲
雲浪動澎湃聲吹地將浮勢擊山欲壞黃頭雖輕生拔
柁不敢懈有時湛明鏡峰吐青幾塊烟中樹若莎波上
舟如芥漁就沙岸炊客來水祠拜震澤思禹功夫椒記

吳敗白魚逢夏出黃柑待秋賣我性好遊觀夙負雲水
債欲尋鷗夷舸不顧涉險戒人生亦何為世故自拘械
萬事風飄花百年露垂蠶何當叩林屋秉炬訪仙怪試
探不死方為人起痾瘵

天池

靈峰可度難昔聞枕中書天池在其巔每出青芙蓉湛
如玉女盆雲影含夕虛人靜時飲鹿水寒不生魚我來
屬始春石壁烟霞舒灑灑月出後泠泠雪銷餘再汎知

神清一酌欣慮除何當逐流花遂造仙人居

劒池

干將欲飛出巖石裂蒼礦中間得深泉探測費修綆一
穴海通源雙崖樹交影山中多居僧終歲不飲井殺氣
凜猶在棲禽夜頻警月來照潭空雲起噓壁冷蒼龍已
化去遺我清絕境聽轉轆轤聲時來試新茗

練瀆

吳越水為國行師利舟戰夫差開此河餘艘試親練十

萬凌潮兒材比飲飛健鼓棹激風濤揚舠逐雷電當時
意氣盈謂已無勾踐鷗避去沙洲龍愁閉淵殿恃強非
伯圖倏忽市朝變臺上失嬌姿衆間掩慚面至今西山
月恨浸秋一片猶有網魚人時時得沉箭

明月灣

木葉秋乍脫霜鴻夜猶飛扁舟弄明月遠度青山磯明
月處處有此處月偏好天濶星漢低波寒芰荷老舟去
月始出舟迴月將沉莫照種種髮但照耿耿心把酒酌

水僊容我宿湖裏醉後失清輝西巖曉猿起

越來溪

溪上山不改溪邊臺已傾越兵來處路流水尚哀聲昨日荷花生今朝菱葉死亡國不知誰空令怨溪水

採蓮涇

青房戢多子採得儂心喜今夜水風涼君王宿船裏行處綠雲迷歌聲一道齊回頭調越女何似若耶溪

顧辟疆園

江左風流遠園中池館平賓客久寂寞孤兔自縱橫秋
草猶故綠春花非昔榮市朝亦屢改高臺能不傾

松江亭

泊舟登危亭江風墜輕幘空明入遠眺天水如不隔日
落震澤浦潮來松陵驛絲絲洲渚平莽莽葭莢積凭欄
不敢唾下有龍窟宅帆歸雲外秋鳥下煙中夕欲炊菰
米飯待月出海白喚起弄珠君閒吟第三笛

南峰寺

樵歸衆山昏天峰尚餘景欲投石門宿更度西南嶺遠
聞雲間鐘蘿逕入寺永懸燈照靜室一禮支公影鳥鳴
澗壑空泉響窻戶冷對此問山僧何如沃州境

楞伽寺

夕陽西下嶂返照東湖水來尋古寺遊楓葉秋幾里叩
門山猿驚維馬林鳥起鐘聲出煙去半落漁舟裏楞伽
義未曉塵累方自恥欲打塔銘碑從僧乞山紙

慧聚寺

鳴鐘警速方枯僧兀跌牀石姿生寒稜松子落古香殿
鎖山雨氣樓迎海曙光遙望蒼蒼城愁是車馬場

寒泉

遠落叢峰間平流盤石上月照欲成潭風吹不生浪聲
兼寒葉下色映秋苔漲野客照羸顏曾來倚筇杖

乘魚橋

橋上西遊人橋下東流水遊人如水流朝暮何時已誰
知有飛仙赤腳踏神鯉波驚風蕭蕭渡海秋萬里左招

騎龍君右攜乘鸞子笑餐紫雲英同詠珠宮裏歸來舊
城郭千載一日耳下看橋上人還隨鷄鳴起去者已如
灰來者猶似螳不解養谷神紛紛自生死

走遁菴

閒登待月嶺遠扣樓雲關石室閉千載高僧猶未還殘
燈黃葉下古座青苔間不見跣趺影鶴鳴空此山

鬪鴨篇

春波漾羣鳬戲鬪每堪翫宛轉迴翠吭襍振文翰聲

兼江雨喧影逐浦雲亂唼喋隊初交紛披勢將散持敵
忽同沉呼嘯更相喚時陳水檻側或聚湖亭畔長鳴若
賈勇遠奮如追竄荷葉觸俱翻菱絲胃齊斷魚駭沒中
流鷗驚起前岸心踰隴雉驕氣壓塲雞悍海客朝自驅
溪娃晚猶看稍欲礙行舟渾忘避流彈苦爭應為食幸
勝非因算微鳥昧全軀臨川獨成歎

言公井

寥寥武城宰遺井虞山陰千載汲未竭九仞功應深
甃

固自可濯道源誰復尋絃歌聽已歇瓶綆看還沉無為
漂弗食惻惻起歎音一瓢樂未改庶幾回也心

弔幽獨君

君本何代人姓名復為誰何年棄人間長眠此山陲荆
榛鬱蒙籠孤墳上無碑游魂久未化哽咽還能詩人歿
乃歸滅憂樂豈復知君何獨煩冤猶有親愛思一死衆
所同已矣焉足悲陳辭為相弔此理君當推

靈巖寺響屨廊

君王厭綵竹鳴屨時清耳獨步六宮春香塵不能起那
知未旋踵麋鹿遊遺址響沉明月中跡泯荒苔裏此夕
意誰過空廊有僧履

陪臨川公遊天池三十韻

羣山瞰笠澤勝覽兼曠奧曩遊務窮蒐甲乙誌曾到茲
峰最靈竒獨失有遺悞我公仙署居休沐偶得告林壑
軫遠情招攜誓同造出郭縱鞍輿入谷屏牙纛時當寒
冬晨嵐霧恣披冒幽幽霜泉微卷卷風葉燥尋溪見人

煙問嶺知佛號意行恐迷誤遠托樵子導居僧作蠻音
揖杖喜迎勞客來豈先知定有山鬼報始至已愜心塵
念為除埽壁穹冠玄雲池古貯清潦長松挂其顛美竹
蔭其隩浮暉蕩空明萬影鏡中倒嶙峋江頭石突起類
爭暴緬懷融結初天巧亦多耗探深識後返升險戒前
躁遠梅苦相邀飛雪糝衣帽谷猿晚應饑澗鳥寒不噪
欲歸更留憩禪榻近茶竈詩歌叢桂篇琴奏猗蘭操我
起前壽公樂哉此高蹈及春幸重來芹藻應可芻何須

效羊公登峴發嗟悼世事舟陸行有力孰翬昇富貴不
可求盍亦從所好斯理苟未宜山水解相傲微言儻或
然勿為俗士道

夜飲余左司宅得細字

春會非有期春愁本無際焉知君子堂此夕相與詣燈
銷月窺欄角警霜委砌舞影憐鶴長吟聲笑蠅細鄰雞
易催旦共歡休復寐喪亂得茲歡疇云匪良計

劉凝之騎牛圖

夫子初亦仕絃歌潁之涓園廬忽在念解綬言歸期方
春養孤犢既耕亦以騎春風草茫茫出遊徧山陂田家
有美酒輒醉不復疑當昔天聖間實號休明時豈無理
人術終懼塵鞅縻嗟今屬喪亂懷策競欲施清芬遠莫
挹載誦廬山詩

贈兒醫吳氏昆季

洗菊夜潭月斲苓秋塢雲偶因念殤者來此市人羣問
術或禽戲觀書皆烏文誰知仙籍裏元有兩吳君

京口張氏世壽堂

天與下民壽各有百歲期行年不能滿人自傷折之難
鳴晨闌開衆車起交馳茫茫欲海中神化那能知醲鮮
薦廣席妖妍貯深帷白日未及終紅英忽先萎春風北
邛原青草塚纍纍借問其下人得老還與誰翁家鶴谿
陽先朝業書詩一門四葉來俱聞享期頤世壽何獨能
世德尤不虧翁今眉生毫益以道自怡浮雲等飛煙昏
旦從變移不嘒華池漿寧餐古柏脂澄觀息內想心閒

自難衰一牀坐松陰風巾夕披披垂魚立侍側亦有白
髮兒嗟我生甚晚况復值亂離故老不復親猶及翁在
茲願言拜堂下聽說承平時

剡原九曲

其一

欲知溪流長百轉來越嶠舟行安能極嵐路入斜照清
景不足娛昔人豈辭詔石硯久難磨空林閉遺廟

其二

殿中初未仕高節振衰謝讀書在茲丘蕭然竹間舍王
來有深言留宿山水夜誰云南陽翁獨枉將軍駕

其三

山折水暫旋山開水仍往東陂匯初成秋色瀾然廣碧
蘿花茸茸月映石壁上何時試沿洄一理煙中舫

其四

密篠覆碕岸石穴黝而深居人負薪歸駐聽風水音回
看蓮花峰靄靄生夕陰不有僧鐘來高路誰能尋

其五

石洞篝火入石室
敷牀居白雲
開層巔上有丹霞書
神仙不遠人
但使粗穢除
何必瀛洲外
茫茫問飈車

其六

危梁渡清瀨
逶迤入前渚
犬鳴樹蒙籠
煙景暗墟聚
雨中耕叟歌
月下歸人語
欲尋仙尉蹤
淒涼一茅宇

其七

清暉汎悠悠
東與前溪合
菱葉間荷花
風來秋颯颯
颯久

行愁寂寞忽有人煙雜我欲發棹謳漁郎肯相答

其八

俗駕不可到有地嶼中小迴迴別澗通宛宛連岡繞人家林谷暗不見旭光曉東作起炊藜惟應候啼鳥

其九

入江水稍決霜降未可涉頗聞往來人出門即舟楫前飛鷺鷥遠下飲垂孫捷何處問興公風吹赤棠葉

詠殘燈

凝寒結重暈逼曙零孤朵膏空逐漏水焰在同爐火戀
影未成眠更就餘光坐

驅瘧

我生東海壖氣濕素善支方暑忽遘疔未旬愧消羸俄
頃水火爭寒冰繼炎曦楚續甫謝挾齊紈遽尋持戰如
恐墜陷燒若當遭炊向夕勢漸消臨風與清池既去謂
遂息明午復如期俯仰天地寬無地竄眇軀思我到貧
病由是生笑噎豈伊水帝子遺威肆相欺會當濯滯昏

靈藥難進施里閭習巫風柏鼠勸禳驅韓子蓋有托誰
能辨其詩

早過南湖

湖黑月未出蕪葭露淒淒榜人識浦溼不畏荒煙迷殘
夢詎可續舟搖櫓聲齊開篷望天邊斗柄插水低津遙
未見樹邛近纔聞雞自嗟遠遊人中宵走東西不如沙
頭鴈宛頸猶安棲

春日言懷

芳樹何靡靡鳴禽亦啾啾時物豈不好人事誠多乖憂
來卧閒房語笑孰與偕天道諒不昧薄願終能諧惟當
守貞靜有酒陶中懷

題晚節堂

人生百年壽六十未為晚胡為鑿玄扃結亭此山阪周
圍松櫟高可翫不可挽日暮春雨晴黃鳥啼睨睨東家
鶴髮翁方置萬金產貽謀非不佳竟為識者莞君能超
物理生死若往返一笑步松陰青山在吾眼

與客攜樂遊寶積山遂泛石湖

雲山擁春郭煙花漲晴川看花入山中諸峰恣攀緣客
吹玉管笙合以金柱絃清陰度碧嶂松風助冷然宛若
鸞鳳吟香眇入紫煙行人盡矯首響遏雲中仙下山興
未闌相攜更登船虹收嶺外雨鳥沒湖中天嵐翠破夕
陽樓閣影倒懸酒傾綠脂膩鱸斫瓊絲鮮獨恨無紅妝
清波寫嬋娟微風吹帆緩欲使歸途延衆賓起歡呼船
溯水漫舷回櫓掠寺過楊柳山門前此地有離宮美人

艷當年羅裙罷春舞草色餘芊綿況我昔此遊冠蓋十里連重來復誰在新知滿中筵人事既若斯今古俱可憐能遊即稱達何須問愚賢我欲叫馮夷捧月出海邊醉後不歸去相照船中眠

謝陳卿惠冠

佳木產異域質理密且堅斲為野夫冠巍然著我顛故人遠貽贈皎若瓊瑰鮮覽鏡見雅宜鄙姿忽成妍持報乏金玉殷勤在斯篇

獨步登西丘

幽卧意不適出門聊獨行惻惻田野中斜徑多不平逶迤登遠丘迢遞望高城風交二麥動煙迴孤花明偶逢植杖翁疑是古耦耕欲問恐相誚歸來悵中情

袁氏高節樓

海上有高樓朱甍煥晨光清風自遠至吹動羅衣裳樓中單棲人憂思起彷徨良匹已久歿自誓不再行欲取哀琴彈仰見孤鴻翔孤鴻去何極撫景空歎息感傷嬋

娟容思作憔悴色憔悴非一時黃泉以為期含情不能
道聊詠兩髦詩

閒理篋中得諸友詩存歿感懷悵然成詠

閒理亂帙中乃得故友篇顏色見遺翰瓊華尚清妍憶
昨遊名都結交此羣賢日枉貽贈詞情文藹相宣俛仰
未十周飄零若雲煙生者應白首死者俱黃泉屈指俱
別離羈愁獨江邊舊懷誰能識灑涕東風前

柳絮

輕盈易飄泊思逐春雲亂已拂武昌門還縈灞陵岸沙
頭雀啄墮水面魚吹散官樹曉茫茫哀歌腸欲斷

徐博士愛日堂

曜靈趣頽運忽去不待人壯者亦恐衰况乃頭白親心
長景苦短何由盡歡忻當朝遂慮夕在夜俄驚晨無繩
繫飛鳥使之少逡巡置酒上高堂為樂且及辰此日誠
可惜此意良難伸安得延年術為親保長春

答衍師見贈

衍師本儒生眉骨甚疎峭軒然出人羣快若擊霜鷄早
嘗垂長紳挾冊誦周邵欲陳興壞端往應乞言詔乾綱
會中顏四海起攘剽仰頭望天局氛祲匿義曜藩邦日
尋兵纁玉罷朝類木顛豈繩維長往遂淪耀披緇別家
人欲挽首屢掉超哉休遠徒高躅願追紹初來北城剝
駐錫問宗要相逢共宵哦篝火樹間照篇成出叩鉢鋒
疾驚楚僇我或勸之冠不答但長笑留連忽中離名山
赴佳召頗知此行樂夙志酬歷眺吳峰戴襍登楚水投

丈弔江秋雨鳴瀨海曙霞發嶠靈竒務窮蒐不憚躡遐
徼東歸始安禪幽谷斬蓬藿坐敷雲中衾薜屋一澗繚
前年逐戎旃野出事田獠是時陰飈作山黑捲狂燒不
畏猛虎過車宿傍楓廟聞師隔煙嶺無寐聽猿叫晨興
雪滿壑衣濕寒未燎空林斷樵蹤兀兀見來轡相邀至
巖扉杉木穿窳寮深房煮山藥乾葉燄風鉞頓釋行旅
顏瓢綠欣欣醕促還不能淹喧寂嘆殊調邇來竟何成
三十匪年少恨無關弧力結束從嫖姚間坊借書披危

坐似持釣行憂釜見奪謁恐冠遭溺逢人戒談時澀縮
刀在鞘軍聲五月急市粟無錢糶壯氣漸欲磨妻拏困
纏繞堂筵賓履疎暑夕行熠燿師來贈長句有譽無鄙
誚組章眩芬專金奏聆要眇據梧起豪誦心疾渾可療
回顧平生吟真咽蚯蚓竅上天宰玄化亂治方巨料性
命如窮鱗儻獲脫罾罟卜居計已決不待龜灼焦過湖
就稻蟹靜處容不肖安能效羣女倚市鬪妍妙泳風或
鳴橈耕月還荷蓀師當重見尋東臯一舒嘯


謝周架閣移送菊花

杪秋始授衣我歸視南園荒逕久廢鉏舊菊今不蕃節
臨乏采翫何以慰憂煩東鄰幸分致離離擢深根幽馥
辭別圃佳色羅前軒愧無樹灌勞獲此英翹繁日出寒
衣祛孤蝶來飛翻我亦愛其芳繞叢詠微言安得與君
子飲泛同一樽霜露懼遄殞歲宴空籬藩

送蕭隱君自句曲經吳歸維揚

適從江東來復作江壯去來去逐江雲蕭蕭舊巾履身

帶煙蘿雨初下大茅峰孤帆拂楚樹遙聽廣陵鐘去家
忽來歸憐君似黃鶴日暮渺相思淮南桂花落



大全集卷五

欽定四庫全書

集部

大全集卷六

七

詳校官庶吉士

臣李傳熊

中書臣劉源溥覆勘

總校官原任中允

臣王燕緒

校對官中書

臣李斯咏

謄錄監生

臣蕭準

欽定四庫全書

太全集卷六

明 高啟 撰

五言古詩

賦得真娘墓送蟾上人之虎丘

色相終壞滅佳人能久妍
斷碑山寺裏小塚竹林邊
蘭葉春風帶苔花暮雨鈿
情畱吳苑客夢逐楚臺仙
物外全真念人間斷俗緣
高僧方宴坐身在散花天

友竹軒

世人務結託車馬紛交馳言笑雖強歡衷懷詎相知中
林有君子淡然夙與期虛心兩無阻榮悴焉可移朝尋
披煙逕暮對寨風帷非此君為偶誰共歲宴時

遷婁江寓館

寓形百年內行止固無端我生甫三九東西宜未闌去
年宅山陲今年徙江干野性崇儉陋經營唯苟完閨窗
俯平疇幽扉臨遠湍豈忘大厦居弗稱非所安披榛始

來玄霜露淒以寒誰云遠親愛弟子相與歡室中有名
酒歲暮聊盤桓

雪夜懷周著作

燈照竹林雪寢齋寒更空窻間成獨坐遙想故人同不
有孤吟興寧度此宵中

登西城門

登城望神州風塵暗淮楚江山帶睥睨烽火接樓櫓并
吞何時休百骨易寸土向來禾麥地雨露長榛莽不見

征戰場那知邊人苦馬驚西風笳烏散落日鼓鳴鳴城
下水流恨自千古

期家允宿東湖民家不至

東湖欲上月寒鳥已棲煙何處相期宿柴門汀樹邊未
嘗新漉酒猶望遠來船誰信姜肱被今宵還獨眠

送陶兵曹之越

高齋掩林雪獨卧玄景暮夫君定何聞此日勞我顧清
言一歡然孰云昧平素方期締深約幽抱終以布胡爲

遽嚴裝明發首東路手持三公檄新辟當遠赴薄祿豈
足羈知君為親故况茲句踐邦山水夙所慕湖明夕棹
來谷迴寒鐘度留滯自成悲無因共遊鷺

豐城余君夢彩堂

楚客身未歸悠悠念庭闈濤江雖云廣莫阻魂夜飛秋
陰天無星猿呌楓樹稀家山倏已到不失舊路微宛然
在高堂獻笑試舞衣焉知空館曙鐘動殘燈輝難追夢
中歡益發覺後唏誰能傳爾翼遠去成相依

過束氏廢園

人間樂事變池上高臺傾歌堂杏梁壞射圃菜畦成不見
妓釵影詎聞賓履聲來斯欲攄抱念昔反傷情

送倪雅

交游結深歡離別生遠念聊持毛子檄暫脫劉生劍南
風柳下亭杯動江色灩山遙馬嘶驛日落蟬鳴店此去
漸成名馳驅君勿厭

同徐山人賁過妙蓮佛舍訪王主簿

逸人如高僧，傲吏同隱尉。
閭房對清夏，共挹池荷氣。
煙帷棲鵠馴，風鐸驚禽畏。
明日雨還來，山櫻當孰未。

題帶經漂麥二圖

朝鋤東臯上暮鋤西陂側，
釋耒讀遺經欣然此休息。
因觀舜稷事耕稼寧辭力。

田中刈麥罷把卷忘其疲，
風雨忽云至千穗漂無遺於
書苟有得歲晏何憂饑。

秋日山中

山澤含霧雨偶來若居夷我無遠遊志何與親愛離暑
退初可喜秋來轉堪悲壯顏豈草木憔悴同此時中心
與百憂日暮如有期悄悄出空宇悠悠適荒陂阮窮勿
復歎天欲昌吾詩

宿幻住棲雲堂

窗白鳥聲曉殘鐘度谿水此時幽夢迴獨在空山裏松
巖留佛燈葉地響僧履余心方湛寂無使羣動起

送賈鳳進士

新逢洛陽客握手共遊般如何異鄉土乃得此交歡相逢既不易相違亦良難驅馬夕云返北風野多寒登高望山川浮雲杳漫漫羣獸相號呼哀音摧心肝遊子念高堂歲晚身得安人生如蓬萍飄流無定端重合諒有日長歌聊自寬

寄王七孝廉乞貓

鼠類固甚繁家有偏狡獺厥質亦陋微朋聚工造怪舞庭欲呈妖憑社期免敗饒同善飯頗暴比橫行噲倉偷

自詫肥穴寬寧辭隘唯思淮南舉不悟河東戒嗟余守
窮僻有屋如敝廨公然肆相欺遠告來別界嚶嚶鳴橐
頻宰宰緣幙快伺暗忌燈然聞腥喜餐餲空牀印凝塵
高壁墮墮塊核遺槃果亡汁覆罌齏壞輾霆駭怒鬪急雨
疑流噉書殘費補妝裯浣煩烘曬入廁客驚呼守舍奴
憂誠豈無老烏圓昔壯今何憊不修司捕職垂頭象瘡
噴難求許邁符莫具張湯械尋蹊漫設機薰隧徒吹韞
遂令不眠人中夜長抑噫君家產街蟬許贈不以賣願得

縱驅擒淨若刈菅蒯盡殺豈匪仁去害容少懈高枕幸
無苦君惠當再拜

送客之海上得誠字

卧廐困田子抱關老侯生豈無一時辱終有千載名子
亦屈身者薄祿非所榮結歡誰云淺一杯吐衷誠艱難
我何托所托在友朋平生不傷離此離骨為驚白日川
上沒歌作變徵聲明朝欲觀海浩蕩逐東征

冬至夜坐懷周記室

夜聞驚鴻來一室寒且靜明朝日長至夜漏方最永淒淒霜塗階皎皎冰入井故人昔同宿杯酒笑相領年運方重周歡事忽盡屏別離孰無有爾獨限殊境達曙恨難裁殘燈兀孤影

賦永上人紙帳

剡藤裁素幃坐使諸塵隔冬室自生溫寒窻屢驚白不隨直省被長覆棲禪箬思曾雪夜時宿伴山中客

初開北窗晚酌

時寓江上外舅周隱君宅

春暄罷淒風朝始開北牖青山入吾座不異延故友自
掃榻上塵琴冊列左右悠然坐其間傲兀醉杯酒況當
江花落微雨斜日後遠見帆度川高聞鳥鳴柳孰云非
吾廬居止亦可久人生處一席累榭復何有幽懷悟澹
泊末事辭紛揉更擬長夏眠風期結陶叟

夏日與高廉遊無量佛院還憩王隱君池上

久卧困炎燠煩抱思一浣霖雨留暫涼言出欣子伴悠
悠去景得稍稍來迹斷已尋名僧廬復謁高士館蒲荷

共含風池上新葉滿步陰覺衣輕汲冷嫌綆短幸無塵
中役樂此林下欸鳴蜩嘒斜陽歸駕猶可緩

曉起春望

今朝有春意原野晴始綠疎花未破煙新禽稍鳴旭物
情各欣榮客意胡刺促居閒厭寂寞從仕愁羈束兩事
不可齊人生苦難足安得長放歌花開酒醅熟

陳氏秋容軒

西郊莽迢遞川樹凝煙景雨過落紅蕖斜陽半江冷蟬

鳴山欲暗鴈去天逾永孤客對蕭條應嗟鏡中影

瞻木軒

道士李玄修所居庭有凌霄花依樹而生近樹
伐而凌霄獨存因以名室求予賦詩

凌霄託高樹引蔓日已長纏綿共春榮幽花藹敷芳高
樹忽見伐無依向風霜亭亭還自持柔姿喜能強君子
貴獨立倚附非端良覽物成感歎為君賦新章

雨中遣興

積雨坐無悶端由便寂寞好鳥不頻啼閒花自遲落行
園每度徑望岫時登閣只此可終期何當有樽酌

題方厓師聽秋軒

西澗獨趺處涼飈度虛閣秋從夜深來流音滿林壑初
鳴忽澎湃稍定還蕭索月下暗禽翻牕間危葉落上人
習靜定談籟笑南郭喧寂兩無聞星河在寥廓

與內兄周思齊思義同過僧浩西齋夜酌

雨過月在花疎鐘閉禪舍幽僧與逸人對酌明燈下園

樹稍辭春池蛙正鳴夜嘉會莫蹉跎流年易傾謝

萱草

不見堂上親空樹堂下草夏來風雨繁離披數叢老日
暮欲忘憂牽芳轉傷抱

月林清影

疎林逗明月散亂成清影流藻舞波寒驚蚪翔壑冷雲
來稍欲翳風動紛難整圓魄忽西傾愁看墮空境

春草堂

靡靡堂廡草託根近華楹膏露既灌芳惠風亦揚馨匪
蒙陽和力孰使微物榮中天駛景流青節坐易盈但憂
德澤違豈惜憔悴并願言相蔓結遮彼春逝程寸心雖
難報拔去還當生

次韻內弟周思敬秋夜同飲白蓮寺池上

月出露已白荷花香滿池高僧愛清夜留客坐題詩竹
動鳥驚夢草涼蟲語悲閒齋一瓢酒應不負幽期

聞鐘

迢迢煙際發隱隱巖中應初來覺寺遙乍歇看山暝惆
悵未眠人空齋幾迴聽

詠雨酬張進士羽見寄

珠碎復絲輕颺迴乍拂楹望中來曉峽愁裏度秋城莎
溼蛩應冷荷響鷺還驚聽絃知瑟潤卧簟覺幃清一覽
停雲句離抱轉難平

徐隱君陋居

修途息往駕環堵老所依蕭條窮巷中故人亦來稀交

交風雨侵翳翳蓬藿園局促不苟厭暫出復來歸名都
列飛甍煥耀朝日輝爽塏豈不慕終憂蹈危機心舒體
自適道在願無違茲焉樂飲水回賢良可希

西園曉霽

積雨淹夏半始晴園景饒高林上初日遠水泛迴颿餘
情萱際蝶新響樹間蜩詎必勞觴詠煩憂坐已銷

題畫鷹得嘯字

高風動古壁竦立見蒼鷄軒然欲飛揚嗟此粉墨妙秋

筋束老骨天寒勢逾矯腦枯草中兔氣盡捱上驃健鵲
雖百餘凡材豈同調乾坤正肅殺怒氣號萬竅大野開
平蕪悲臺落殘照荒城有妖狐夜作猛虎嘯為君試一
擊壯士慙勇剽安能飽拳肉側翅隨年少

哭王隅

車行一輪摧鳥奮一翼傷人生失輔友誰當共提將相
逢豈無人不獲如子良朝遊羣彥林夕棄萬鬼鄉春風
吹南原百草萎以長呼君不歸魂割我欲斷腸豈不悟

生滅情至諒難忘

池上晚

春晚思悠悠閣前池水流
新蒲風葉響如對野塘秋
野塘前歲路已隔歸舟度
鳥下獨回頭青山杳然暮

醉歸夜醒聞雨

覺來聞雨聲燈輝耿殘夜
窗間有危葉暗助瀟瀟下
不記醉歸時寢齋如客舍

夏夜起行西園

夜熱不能寐起步中庭前舉頭望高旻離離衆星躔欲
推理亂象天道幽且玄長歌來涼飈驚烏北林顛此時
層城閉悄悄萬室眠誰復相與娛淡月孤光懸

師子林池上觀魚

穿蒲尾獨掉暖蕒口羣仰波平沒見痕池靜跳聞響漁
畧已免捕僧孟每分養落日意無驚識我臨流賞

和張羽懷吳興舊遊之作效其體

城貫綠川長朱閣暎飛梁鶯嬌山唱度蓮豔水嬉張花

重搦翠管桑婦挈銀筐若谿酒脂碧顧渚茗旗香擇勝
事未厭驚亂意俄傷回看舊遊地秋草變淒涼

送沈徵士鉉歸海上

我友張國士短若婁君卿家無一金產所結皆豪英去
年東方來向我道爾名相逢真甚都座客為之傾高標
華月出雄辯流泉崩時方尚權謀處士皆振纓諸侯致
幣聘公子將車迎爾獨念滄洲扁舟問歸程翩翩冥飛
鴻影過海上城儻見魯連子殷勤煩寄聲

重午書事

采蒲臨綠波團扇送涼過
越客爭標渡荆巫弭節歌
家醕憐浮玉宮衣憶賜羅
今年兵氣惡朱符佩更多

東白軒

昔宿東峰顛長夜何曼曼
起看玄景晦冰雪積未泮
翻驚濤瀾黝黝失星漢悲
風吹木石澎湃而凌亂太
陽淪朱光陰火吐微煥山
精與罔象乘暗出遊翫前
巖挂猴猱後嶺起鴉鵲一
時互號叫哀厲客腸斷芒
禹九

州下視莫能判如身墮幽都涉水濟無畔金烏在地底
其出疑可喚雄雞棲高樹凍噤不振翰君家有層軒不
異泰山觀扶桑拂檐楹咫尺海東岸酒醒四鼓發陽谷
已昇半紛紛物象出稍稍涼暄換如盲得復明毫末皆
可看山中舊所聞寂然應屏竄何當此借榻夙興不待
盥共賓羲和車一觀天下旦

賦得姑蘇臺送賈文學麒

城上聞啼鴉臺前見遊鹿悠悠畫簾影薄暮澄潭曲雲

隨歌舞散日與興亡促美人不歸來湖水春更綠思君
別後登應盡天涯目

聞晚鶯

時在園城中

昨歲聞孤囀綠陰山院行今朝寢齋雨重聽獨含情西
澗多喬木何為亦到城

西齋池上三詠

葵花

豔發朱光裏叢依綠蔭邊夕同山薜落午竝海榴燃幽

馥流珍簞鮮輝照藻筵羣芳已謝賞孤植轉成憐

荷葉

楚服新裁得吳筩舊製成圓應間荇菜密欲翳蓮莖聲
中亂雨至陰下一魚行桂棹還思折江南日暮情

桐樹

晴粉朝英墜涼瓊夏葉舒鳥啼高樹早蟾轉薄疏虛朱
弦未薦曲彤管屢題詩坐恐銷華澤商吹起前除

遊城西得艷字

軍旗表山柵商鼓喚津店稻黃雲有香楓赤火無焰賞
懷誓飲償眇目擬窮占思畋已繁弢欲賦更橫槩煙開
象極津波溢類洪墊壞宮茨被垣棄壘對漫塹晨喉鵲
鴻多秋腥鱸蟹膽吼鯨報僧粥卧獸衛官空揖道訛語
談映離陋妝硯池開沐女盆石拔鬪夫劒竿危鬧鈴響
紗古冪燈艷時艱遊總稀歲稔酤饒醺探囊出奇蒐捫
弩脫浮念一覽一興嗟再到再忘厭吟將嘯援賡歸用
棲鵲驗壑虛哀商叩嶺豁初魄閃宵宵聽鳴鍾翩翩戒

還轡興清逼林淒醉纈眩湖灩顧標山已違入郭塵復
染幽景慮遂逋拙詞紀姑僭

卞將軍墓

代馬飲洛川皇興寓江左宰輔失良圖國門屢興禍惡
木不可植猛獸終難馴冠軍歷陽來白日飛黃塵兵叩
西陵關火焚大桁口虎旅方敗奔六宮竟誰守卞公仗
戎鉞勇氣超常倫立朝素正色臨難仍捐身落日百戰
餘裒創領殘卒父子誓除兇一朝共淪歿當年尚浮虛

風俗變縉紳誰知効節者不在清談人石頭義旗來天
狼夜流血冊贈極哀榮千秋表忠烈六朝卿相塚無數
青山根至今行人過但拜將軍墳馬鬣封未平龍泉氣
猶發惆悵望松楸一杯奠寒月

綠水園宴集

平居寡良會艱哉况茲時幸逢金閨英中筵接光儀名
園過修禊景麗春陽熙綠芷榮曲沼朱華敷廣壝情宣
寄高文憂襟為之披觴來不敢訴慮此朋歡虧何以淹

返旆願光願遲遲

答宋南宮見寄

時寓江上

棲寓豈高遁偶家南渚濱雖欣遠物累終悲寡交親
桴舟近入郭言欲訪故人叩門子不在思懷竟難伸
歸來掩蓬廬幽卧屬始春風暄柳意動雪霽禽聲新
孤遊盼芳物尊酌孰與陳念昔文翰場弱蹤繼清塵
鳴絃東閣夜飛蓋西園晨茲歡與年徂憔悴兩未振
朝蒙枉瓊藻慰我佇慕勤深情寄妍詞不殊握中珍
居屯在守志養

素豈辭貧裁章以少答此道願無淪

夢梅堂

寢齋掩殘雪幽幔燈微皎不知南澗濱魂與春縈繞初
迷月入樹忽斷風驚篠餘馥悵難尋空山鶴鳴曉

送程校理遊江上

風亭裊離管草綠江水暮送此南浦人孤帆雨中渡別
傷足自緩前驛花滿路春叢戀山鶯晚絮迷汀鷺我今
獨愁居芳月誰與度佇立望遙波相思積煙霧

僧齋聞雨

寂寂初罷語悠悠未成眠高齋有春雨夜半落燈前已
傷花委樹復念水盈田老衲獨無聽繩牀方坐禪

懷徐七

哀鴻已鳴渚落葉初覆陌故園當授衣却思遠行客
行日已遠我思日已積東南望歸棹鳥去煙波夕憂來
不成言滿抱空戚戚豈無一尊酒黃花為誰摘

四柏

堂前四小柏羅立二尺長始栽附南墀遠移自東岡春
夏衆草芳翳沒成久荒低枝網蟲縣暗葉螻蟻藏不沾
夕露氣每隔朝陽光我病廢芟理覽之屢彷徨立冬戒
嚴候迅風激飛霜蕪穢忽自除鬱然露蒼蒼恍若羣梟
散鷓鴣雛得翱翔乃知受命正雖弱自可強循步賞勁色
撫攀挹微香幸得依我居勿令縱牛羊他年培養成凌
雲孰能量後彫誠足貴早厄庸何傷

西臺慟哭詩

越人謝翱嘗為宋丞相文山公之客公死之十
二年登釣臺祭公以哭自為文識其哀曰西臺
慟哭記東陽張兼持示求詩僕感其誼遂賦一

首

幾幾子陵臺其下大江奔何人此登高慟哭白日昏哀
哉宋遺臣舊客丞相門丞相既死節有身恥空存北望
萬里天再拜奠酒尊陰雲暮飛來恍如載忠魂所哭豈
窮途中抱千古冤上悲宗周隕下念國士恩淒涼當世

事感慨平生言空山誰知哀惟有猴與猿豈不畏衆驚
聲發不忍吞人言天有耳此哭寧不聞願因長風還吹
此血淚痕往墮燕山隅一灑宿草根田橫去已遠茲道
不復論作歌悼往事庶使薄俗敦

見耕者

茲晨有佳興挈杖行遠墟春犁稍已出土脉向暖舒嚶
嚶鳥囀谷瀏瀏泉鳴渠歲功自茲始為農亦良劬而我
情四體偃息在敝廬飢匱固當爾無為歎踟躕

雨中書湖上漁家壁

漁舍煙不起，瀟瀟雨初暝。
孤客與羣鷗，寒依葦間聽。
山昏望易失，波動愁難定。
歸思滿蒼茫，空憐去帆迴。

同杜二進士晚登潘氏樓

靄靄川樹暝，夕陽忽然收。
林間一鐘來，隴上衆耒休。
維榜漁石邊，尋我棲寓儔。
本期散憂懷，攜手登此樓。
那知見遠色，蒼茫轉成愁。
幸茲有尊酌，雖晚為君留。

送家兄西遷

昔別歸有期此別去何極西遷屬事變咎責非已得家
貧無行資空橐辭故國匆匆逐徒旅宛宛謝親識牽攀
不能留慟哭野水側離鴻為迴翔浮雲暮愁色別時雖
云苦未若別後憶願行勿憂家養親自我職殊方氣候
異炎霧秋未息委命毋怨尤長年強餐食

至蓮邨

昔愛茲里幽誓將構蓬廬孰云墮世網重到十載餘喪
亂喜獨完煙火靄舊墟柴門在深巷落日榆柳疎鄰翁

念契闊攜筐饋雙魚苦問客何事顏色與昔殊焉知涉
艱難多戚長少娛貧賤非所恥中情在閒居願翁勿相
誚終當遂吾初

雨中登白蓮閣望故園

亭亭高閣上渺渺清川曲日暮靄羈愁離蘅雨中綠聞
鐘僧已返荷笠人猶牧歸棹獨難尋江南望雲木

尋照公

遠尋林下僧不識林下路隔雲孤磬響因到繡經處相

對竟忘言夕陽在祇樹

江上過丁校書宅留飲

迂樵入浦內言尋故人扉雞鳴邨樹煙寒旭景尚微子
起罷理髮相延闕中闌雅詞旣云宣濁醑亦以揮幸茲
竟日歡一流積慮非尚慙有羈牽暫會復遠違臨流送
我還迴颿夕吹衣亂來人情改高誼似子希儻不終憚
煩卜鄰遂相依

遊靈巖賦得越來谿

越女遊未去越兵嗟已來青山舊谿上無復見樓臺過
客空惆悵荷花秋自開

立春前一日喜雪

一冬纔見瑞三白詎須頻未嫌遲送臘唯憐預占春積
砌猶殘凍妝苑已芳辰留更明朝落梅花欲鬪新

移家江上別城東故居

人情戀故鄉誰樂遠為客我行豈得已實為喪亂迫淒
淒顧丘隴悄悄別親戚不去畏憂虞欲去念離隔雖有

妻子從我恨終不釋出門未忍發惆悵至日夕

雨中客僧舍

客夢方暫適竹間風雨驚起登林端閣迢遞望層城景
寒川樹疎野晦原煙平不邀釋子語何以緩羈情

見花憶亡女

中女我所憐六歲自抱持懷中看哺果膝上教誦詩晨
起學姊妝鏡臺強臨窺稍知愛羅綺家貧未能為嗟我
久失意雨雪走路岐暮歸見歡迎憂懷每成怡如何屬

疾朝復值事變時聞驚遽沈殞藥餌不得施倉皇具薄
棺哭送向遠陂茫茫已難尋惻惻猶苦悲却思去年春
花開舊園池牽我樹下行令我折好枝今年花復開客
居遠江湄家全爾獨歿看花淚空垂一觴不自慰夕幔
風淒其

東陂路上阻水

不覺去邨遠瀟瀟柳間步江雨夜來多春流稍侵路塞
棠自可涉不待漁舟渡

獨酌

白日下午遠川寒風振高柯蕭條掩闕卧暮雀忽已過我
有羈旅愁鬱如抱沉痾起坐呼清尊獨飲還獨歌一斟
解物累再酌迴天和數觴竟復醺翻翻恨愁無多所以古
達士但飲不顧他回頭向婦笑戚戚終如何

同杜徵士寅過南渚赴朱七丈招飲

五月燕雛飛絲成桑葉稀相逢總羈旅白苧未縫衣扁
舟喜同載晚渡滄洲外樹失潮氣昏沙喧雨聲大將迷

路却通窈窕復蒙龍果熟皆梅子禽啼盡郭公兵戈苦
未息莫歎猶為客此去醉誰家江邊主人宅

始聞夏蟬

翻翻纔得蛻咽咽未成喧翳葉誰能見南風綠繞軒乍
驚變節物還念別郊園何待當秋聽方令羈思繁

贈斲苓者

山田不生苗零雨空漑之歲宴窮谷中何以療我飢青
青萬丈松兔絲絡其枝不知何樹下乃有千年脂朝行

西澗濱暮行東岡陞荷鋤偶遠樵言尋亦良疲鑿彼土
石間得此瓊瑤姿香因清飈發色藉玄泉滋嘗讀炎帝
編徵功實多竒天和滌煩滯靈味扶殘衰詎必勞悲歌
去采商顏芝歸來拾荆薪炊之作晨糜八珍豈不美素
餐懼可嗤服斯待輕舉徃與仙人期

我昔

我昔在家日有樂不自知及茲出門遊始復思徃時貧
賤為客難寢食不獲宜異鄉寡儔侶童僕相擁持天性

本至慵強使賦載馳發言恐有忤蹈足慮近危人生貴
安逸壯遊亦奚為何當謝斯役歸守東岡陬

將往海上舟行值雨投僧舍

沙響聞雨來中途生旅愁遙尋晚林磬暫駐寒塘舟窗
下一僧老竹間諸鳥幽誰言阻遠去翻使得佳遊

暫歸鳴珂里舊宅

故廬在東里久出喜偶旋景物亂後非行觀一悽然荒
榛塞園逕流塵蔽堂筵念茲經營初勤苦唯我先蕪壤

棄弗守顧已誠有愆雖懷首丘願未絕遊方緣是主乃
如客暫來靡留連日暮復遠去哀抱將何宣

江上晚晴

江虹斷雨脚反景明墟里宿鳥亂歸邨幽人獨臨水漁
舟隔浦飯煙火蘆中起閒吟望遠岑緩步尋芳並此夕
遇新晴憂懷偶然喜

與王隱君宿寧真道館

松下禮真罷鶴鳴暮壇空偶來古仙居欣與靜者同玄

言不知還遂宿琳館中蒸菌沃芳露焚蘭度微風山瓢
瀉未盡月出秋林東語化衆妙歸探元萬緣窮不與至
道俱何以超妄蒙願從希夷遊稽首青牛翁

送珪上人

曾來看江雨同倚香臺上師今西去遙還上香臺望淮
山暮鐘起楚水春帆漾來去本隨緣分攜莫惆悵

冒雨暮歸過白沙湖

天寒滿湖雨獨棹東歸急遙望水邊邨蕭條暮煙溼家

人應候我深暎柴局立

送袁憲史由湖廣調福建

只謂遠遊苦寧知遠遊樂君今萬里歸顏色殊不惡自
言楚帆開初別鳳凰臺采石月下過匡廬天際來試沽
彭澤酒憔悴陶家柳最愛小姑妍臨行復回首遠逐繡
衣遊閒登黃鶴樓千峰漢陽晚一鴈洞庭秋西上荆門
渚銀釵見巴女歌斷竹枝詞江陵夜風雨看盡幾多山
今朝始得還秋風吹驛騎又欲度閩關閩關聞更好瘴

霧晨收早椰子美如漿蘭花多似草嗟余戀故鄉不肯
涉津梁把酒看君去相思空斷腸

宴顧使君東亭隔簾觀竹下舞妓

美人竹下舞醉看隔簾櫳彷彿瑤臺子遊戲綠雲中玉
鈎正蕩月羅袖忽驚風莫逐青鸞去尊前樂未終

夢遊仙

夢騎蒼麒麟手持白玉鞭長風八萬里夜入通明天正
逢絳闕開謁帝陪羣仙飄飄紫霞珮杳靄青霓旂命與

衛叔卿共讀金華篇
玄文不可識
謫歸一千年
驚寤忽長歎
虛空但雲煙

獨遊白蓮寺池上看雨

輕衣忽變冷
池雨來清夏
圓文細細生
密響脩脩下
荷披魚躍起
樹靜禽鳴罷
賞淡自忘還
非因與僧話

贈薛相士

至正辛丑嘉禾薛月鑑過予求詩因贈

我少喜功名
輕事勇且狂
顧影每自竒
磊落七尺長
要將二三策
為君致時康
公卿可俯拾
豈數尚書郎
回頭

幾何年突兀漸老蒼始圖竟無成艱險嗟備嘗歸來省
昨非我耕婦自桑擊木野田間高歌誦虞唐薛生遠擎
舟訪我南渚旁自言解相人視予難久藏腦後骨已隆
眉間氣初黃我起前謝生弛弓懶復張請看近時人躍
馬富貴場非才冒權寵湏臾竟披猖鼎食復鼎烹主父
世共傷安居保常分為計豈不良願生毋多言妄念吾
已忘

大全集卷六